

INUIT ATAQATIGIIT

INATSISARTUNI



9. september 2013

Inatsisartut suleriaasianni § 37 naapertorlugu matumuuna Naalackersuisunut apeqqquteqaateqarpugut:

1.

Uran pillugu mappersagaq 2010-meersoq naqeqqeriarlugu angerlarsimaffinnut tamanut agguaanniarneqarpa Uranimik akuersaanngilluinnarnermik unitsitsinermik aalajangiineq sioqqullugu?

2.

Naalackersuisut isumaqarpat 2010-mi Canadamut paasisassarsornermit naalisagaq taamatut isikkoqartilluni innuttaasunut paasisitsiniutitut atorneqarsinnaasoq? Taamaanngipat: Angalanermit nalunaarusiaq atuartussanut atuaruminarsarniarneqarpa paasiuminarsarneqarlunilu ilanngussallu taamaallaat tuluttut allaqqasut nutserniarneqarpat?

3.

Nitartakkami nanoq.gl-imi Naalackersuisut urani pillugu paasissutissanik katersuisimapput. Tassani Naalackersuisut innersuussippat 2011-imi TV-ikkut aallakaatitassiamut. Naalackersuisut aallakaateqqinnissaanut iliuuseqarniarpat arlaatigulluunniit iliuuseqarniarpat isiginnaagassanngortinniarlugu, innuttaasunut ukiut marluk matuma siorna aallakaatitami immikkuualuttunik eqqaamasaqanngitsunut?

4.

Kikkunnulluunniit attuumassuteqanngitsunit uranisiornermik nalunaarusiaq naammasseqammersoq uranisiorneq pillugu aalajangiisartunut innuttaasunullu qaammaasaqarnerulersitsiva? Taamaappat: Sooq paasissutissat oqallisigineqarnissaminut saqqummiunneqarsinnaanngillat?

5.

Danskit naalagaaffiannit nalunaarusiat uranisiorneq pillugu aalajangiisartunut innuttaasunullu qaammaasaqarnerulersitsippat? Taamaappat: Sooq paasissutissat Nunatsinni oqallisigineqarnissaminut

saqqummiunneqarsinnaangillat, ingammik nalunaarusiap ilaa Folketingip nittartagaani saqqummiunneqareersoq?

6.

Naalackersuisut nalunaarusianik isertuussinerminnut tunngaviginiarpaat Naalagaaffillu isumaqatigiissuteqarsimagamik "ataqatigiissaakkamik saqqummiussinermik". Danskili naalackersuisuisa akisussaaffitsik saqqummiutereerpaat. Naalackersuisutta suut tunngavilersuutigaat nunatsinni innuttaasunut isertuussiniarnerminnut, ingammik danskit naalackersuisuisa isertuussinissaq pisariaqarsoringimmassuk kiisalu ataqatigiissaakkamik saqqummiussinermik allamik paasinnittaaseqarnertik ersersereermassuk?

(Inatsisartuni ilaasortat, Naaja H. Nathanielsen aamma Sara Olsvig, Inuit Ataqatigiit)

Tunngavilersuut

Uranimik akuersaanngilluinnarnerup unitsinniarnerani Naalackersuisut uteqattaartuarpaat paasissutissat naammattut innuttaasunut tunniunneqartareersimasut aalajngiinissarlu tullinnguuttoq. Aatsitassarsiornermut Inuussutissarsiornermullu Naalackersuisup assersuutigalugu innersuussutigaa urani pillugu mappersagaq 2010-meersoq, Canadamut paasisassarsiorneq 2010-mi pisoq kiisalu TV-mi aallakaatitassiaq 2011-imi aallakaatinneqartoq.

Aalajangiiffissatut siunnersuumminni Naalackersuisut allapput Inatsisartunut ilaasortat kikkunnulluunniit attuumassuteqanngitsunit urani pillugu nalunaarusiamik tunineqarsimasut. Tamannali eqqortuunngilaq. Nalunaarusiaq Inatsisartut ataatsimiititaliaanut marlunnut nassiunneqarnikuuvoq isertuunneqarnissaanillu naqissuseqqalluni. Taamaattumik Inatsisartut atatsimiittarfianni innuttaasullu akornanni oqallisigineqarsinnaanani.

Ataatsimiititaliat pineqartut nalunaarusiap ilaanik danskit naalackersuisuinit suliarineqartumik pissarsinikuupput, nalunaarusiamilu sammineqarpoq Nunatsinni Uranisiorneq. Nalunaarusiaq saqqummiunneqaqqusaanngilaq taamaattumillu aamma oqallisigineqarsinnaanani.

Naalackersuisut nalunaarutigereerpaat nalunaarusiaq aatsaat saqqummiunneqarsinnaasoq Naalagaaffillu ataqatigiissaarereernikkut. Maannakkulli takusinnaavarput danskit naalackersuisuisa sulisitat nalunaarusiaat siulleg isertuutissallugu pisariaqartinngikkaat. Maanna nalunaarusiaq saqqummiunneqareerpoq danskisullu atuarneqarsinnaalluni. Tupigusuutigaarput Naalackersuisut paasissutissanik isertuussiniarnerat, ajuusaarutigalugulu kalaallit danskisut paasisinnaasut internetsikkullu attaveqartut Folketingep nittartagaanit nalunaarusiamik aallersinnaammata, uffa sinneruttut qaqugumuugaluarnersoq utaqqitinneqartussaasut.

Ersarissumik isumaqarpugut Inatsisartut innuttaasullu naammattumik paasitinniarneqarsimanngitsut soorlu aamma uranimik akuersaanngilluinnarnerup unitsinneqarnerata kingunissai pillugit ilisimatitsisoqarsimanngitsoq. Kissaatigisatuarput tassaavoq innuttaasut piviusorsiortumik tunngaveqarlutik, uranimik akuersaanngilluinnarnerup unitsinnerata kingunissai akuersaarsinnaanerlugit oqallissinnaanissaat. Taamaaliortoqassappat pisariaqarpoq sammisaq pillugu paasissutissanik nutaanik paasinartunillu pissarsisinnaanissaq.

Ullut suliffiusut qulit qaangiutsinnagit apeqqutit tamarmik akineqarnissaat kissaatigaarput.